

本朝分省人物考

人物考卷之五十九目錄

江西饒州府 三

許璦

王溥

吳宏

章復

王釐

祝挺

胡閏

張琬

費震

徐旭

孫原貞

徐爵

吳惠

戴弁

董阜民

何英

高峻

王弼

戴皞

劉城

戴琥

戴珊

黎福

張憲

舒清

戴璉

程廷珙

祝瀾

孫需

張吉

李岱

彭程

俞廷瓚

劉蒼

劉麟
余祐

胡居仁

桂萼

補遺

計澄

盧瓊

李頤

本朝分省人物考卷之五十九

江西饒州府

許瑗

許瑗饒州府樂平人讀書聰明強記至正中兩以易經舉於鄉皆第一及會試不第放浪吳越間每醉輒大言自負人未有知之者歲戊戌上駐兵婺州瑗以儒士進謁因言於上曰方今元祚垂盡四方鼎沸豪傑才勇之士勢不能獨安夫有雄略者乃可馭雄才有奇識者然後能用奇士欲掃除僭亂平定天下非攬收英雄難以成功上曰今四方紛擾民困

塗炭予用英雄有如饑渴也授博士畱帷幄中叅謀
議以太平股肱郡命爲知府瑗至厲士卒修城池撫
黎庶庚子僞漢陳友諒率舟師攻太平守將樞密院
判花雲與瑗等以兵三千拒戰友諒攻城三日不下
引巨舟泊城西南士卒緣舟尾攀堞而登城遂陷瑗
被執罵不屈死之上嘉其忠追贈高陽郡侯

王溥

王溥饒州府安仁人仕陳友諒爲平章守建昌頗著
聲望弟漢名漢二亦爲友諒守將太祖南征嘗命
師取建昌不克歲辛丑正月院判朱亮祖率兵擊溥

於饒州之安人港溥以兵拒戰我師不利六月友諒
將李明道寇信州胡大海引兵來援擊破之擒明道
并漢二等十八人因送之朱文忠文忠令二人招溥
復送建康 上命皆仍舊職八月 上帥師討友諒
取江西以爲鄉道江州旣拔友諒奔走武昌溥遂以
九月己酉朔遣使來降俾仍守建昌已而龍興守臣
胡廷瑞亦具書納款壬寅正月 上至龍興溥率衆
來見 上慰勞之尋遣率兵取撫州及江西未附諸
郡是年元張昶之來溥實遣人報於 上甲辰從克
武昌遷資善大夫中書右丞洪武元年諸功臣進秩

詔溥兼副詹事從大將軍克平山東河南燕冀二年
克陝西屢有戰功賜文幣七表裏三年天下既定論
功行賞陞河南行省平章 上欲優待之令食祿而
不視事子孫世襲指揮同知十一年定諸臣歲祿之
數刻石官署溥每歲七百五十石於官田內給與五
年溥遣人來言近督取林木建昌蛇舌巖衆見巖上
有衣黃衣者歌曰龍蟠虎踞勢岩髡赤帝重興勝大
朝八百年終王氣復重華從此繼唐堯其聲如鍾歌
已忽不見 上曰明理者非神怪可惑守正者非讖
緯可于漢之文成五利足以爲戒事涉妖妄豈可信

也後卒于京龍飛記云溥以饒信干戈倣擾奉其母
葉氏避兵貴溪倉卒間母子相失凡十八年葉氏所
在不可知而溥思母亦切是歲正月忽夢母若告以
所在者命卜者筮之其繇辭曰非巖卽穴朽骨是藏
及是溥言於帝曰臣之父晉母葉氏實生臣溥及
弟漢寶而臣不天父也棄諸孤蚤所恃者吾母以長
以教故臣兄弟稍有成立而母亡已十八年微臣無
似獲事陛下比者推恩褒崇三代假寵於王氏甚
厚獨念臣去鄉邑日久倘賜之告得歸展省丘墓以
伸私情臣不勝至願帝爲惻然有制與之所以撫

論之者亦至仍命儀曹具祭物給之溥卽日回家躬率士卒詣貴溪之桃源山向母舊時避兵之處伐木入山以物色求之不得夜號者三日旣乃得其居人吳海能言賊兵逼時夫人病不能行卽自投井中死矣溥又披榛棘尋得井俄有鼠自井中出跳入懷中旋復入井汲井索之葉氏遺骸果在溥哀號益不自勝乃具衣衾棺槨卽其地葬之

吳宏

吳宏饒州府餘干人仕陳友諒爲江西行省叅政守餘干至正庚子七月鄱陽院判干光取饒州以其城

來附。上命僉院鄧愈往鎮之。屢殲友諒舟師。威震
境內。宏深懷疑。沮辛丑。愈以江南叅政行總制事。推
誠結納。撫以恩信。宏大感激。會。上親取江州。友諒
奔武昌。遂全城請降。上嘉其誠。命招諭龍興王寅。
正月。上至龍興。宏率衆來見。上慰勞之。遂改愈
爲江西叅政。移鎮龍興。宏代守饒州。尋遣率兵取撫
州等郡。調守撫州。又從征下武昌。以功拜中書左丞。
後遷親軍。指揮宏涉獵經史。能詩工書。奉母至孝。見
重於士大夫。後卒於京。

章復

章復鄱陽人初仕元爲行省郎中洪武初以儒業應
召授全州府同知勸民耕稼歲獲豐稔乃編農事家
給一冊復興學校創建一新自爲記銘凡遇旱澇禱
之卽應民勒石頌功陞知保寧府後乞致仕朝廷惜
之俾乘驛還鄉

王 釐

王釐鄱陽人自少穎敏博學能文洪武初以明經授
鄱陽教諭多造就人才召爲翰林院編修與修國史
每備顧問奏對稱旨嘗患頭風 上以御用藥酒賜
飲之遂愈後乞外補命知南陽府有善政以疾卒所

著有羣英雜言詩粹若干卷

祝挺

祝挺鄱陽人攻春秋左傳歷官上海知縣遇錢氏爲
變挺討平之尋大軍至將屠邑挺力請于將得已民
感之立碑後擢戶部主事調淞江行省郎中

胡閏

胡閏鄱陽人學博行修素以忠直自許太祖討陳
友諒經鄱陽謁吳芮祠見壁間題竹詩幽人無俗懷
寫此蒼龍骨九天風雨來飛騰作靈物太祖嘆賞
久之遂召至帳下後官都督府經歷遷右補闕進大

理寺少卿 太宗靖難死于直言嘉靖二年提學副使邵銳立祠祀之

張琬

張琬鄱陽人洪武初以貢入太學試高第授給事中轉戶部主事 上問天下財賦戶口琬應對無遺卽進本部左侍郎謹身殿災上疏言時政上嘉賜文綺時歲饑請蠲天下民租百萬餘石 上嘉納之年二十七卒

費震

費震饒州府鄱陽縣人洪武初年以賢良徵爲安吉

州知州以寬惠愛民有善政四年擢漢中知府時歲歉盜起震發倉儲十餘萬粟賑濟俾秋熟還倉易陳爲新盜乃來歸卽令占宅自爲保伍遂得數千家至秋大熟民悉還前粟上聞而嘉之後以事被逮朝廷以震爲良吏釋之使爲牧民者勸用爲寶鈔司提舉十一年以善政陞戶部左侍郎本年陞戶部尚書十二年正月奉命定丞相御史大夫等官歲祿之數刻石官署中書省左右丞相御史臺左右大夫每歲各給二千五百石若駙馬都尉李祺梅殷每歲各給六百石平章李伯昇王溥潘原明每歲各給七百五

十石俱於江西官田給與本年調湖廣布政使後以老致仕

徐旭

徐旭字孟昭饒州府樂平縣人自幼穎悟稍長從其鄉先生蔡仲淵授春秋爲文辭已超詣拔出見者皆奇之年二十一登洪武乙丑進士第授浙江道監察御史入爲禮科庶吉士日記事侍上左右上方屬意天下進士每朝羣臣退獨進士畱被顧問上未退不得退也一日上呼旭至前將有所任使而奏對弗克稱旨上以其迂也命分教於涿州之房

山復教諭鳳陽皆以憂去服闋擢安王府紀善用薦
者陞爲知州入史館上書論天下事多不能合益落
落自殊無所顧惜遂自史館出爲吏部考功員外郎
及成祖卽位遷郎中預修高皇帝實錄永樂元
年拜朝列大夫國子監祭酒旭在高皇帝時素以
篤學見稱數言事切中當時高皇帝嘉納之然欲
老其才故抑之久而未有以用之初在考功拒請托
抑僥倖是是非非毫髮無所遁其情而尤以天下之
治與教在守令與教官守令教官弗稱其任者尤精
覈之無少貸衆望風誼騰持之益堅及在太學亦如

在考功時然旭純謹君子也雖盛威嚴而中情簡質
好惡出乎其至誠至於卓卓自守激之而不動挫之
而不撓人未有過之者也居太學僅一年諸生凜凜
僅自修飾而其僚屬之不便者已譁然議之矣永樂
二年坐書奏當降調雲南叅議 上問吏部尚書蹇

義曰旭爲人何如對曰有文學特守而於人寡合

上曰特守之人固當寡合蓋其中有所主不能脂韋
依阿況兼有文學乎宜寘之近侍特命除翰林修撰
俾預修永樂大典爲副總裁方向用之而旭卒矣時
年五十二 上聞之悼惜勅賜棺以斂遣禮部主事

端禮諭祭焉旭終身坦夷不事表襮而其疾惡剛勁
人有所不堪者世以此高之而亦以此與之齟齬者
衆也其爲學明於義利之辨爲文約而明喜薦士所
薦最多且賢屢考試科舉其得士最盛而尤孝於其
親自鳳陽考試河南時入朝告歸省其母疾方亟旭
聞倍道疾趨至家母疾忽爲愈數日竟卒人必爲孝
感所致云

孫原貞

孫原貞本名璠以字行饒州府德興縣人永樂乙未
進士任禮部郎中歷河南叅政正統十一年巡撫于

謙舉原貞自代中璫王振阻之尋陞浙江布政使景泰元年福建賊吳金八等流劫青田攻圍平陽時鎮守軒輓奏遣原貞與僉事鄺彥譽會勦之五月以功最陞兵部右侍郎叅贊浙江總兵李信軍務二年七月處州盜平奏折麗水青田置雲和宣平景陵三縣十月浙閩盜平進兵部尚書鎮守浙江福建請置福建永安壽寧二縣三年致仕文章勲業取重當時歸老歲寒溪因以歲寒自號成化十年卒八十七國史稱其居官清慎自守多著勞效令終壽考世所難得云

徐爵

徐爵餘干人登永樂乙未進士授監察御史立朝謇
諤風力素勁人不敢干以私 太宗常以小徐御史
呼之

吳惠

吳惠浮梁人登永樂辛丑進士知永興邑風俗素鄙
惠諄諄諭之俗遂丕變民疲不能田惠傭工以代耕
秋乃大稔民得不饑以薦陞解州知州州輸邊儲挽
運甚勞立貧富三等法且聽其附載貨物以易粟上
倉費煩減半輸亦告足民歌曰吳父母恩何溥昔樵

醉今鼓舞乃刻碑頌德

戴弁

戴弁浮梁人領鄉薦自崇陽訓導歷兵科給事中奉
詔行邊簡士卒嚴戍守邊備整飭陞陝西叅議城迭
烈以禦寇衝屯張掖以助軍餉進調廣東叅政適廉
雷諸郡徭徭梗化挺身出諭曰我戴叅政也爾輩何
敢冒死賊曰果我公也公至誠愛民我何敢犯羅拜
而退廣州被圍乏食亟發廩賑之募敢死士焚其攻
具遣使間道引援兵入守遣將協謀平之進布政使
景泰甲戌入覲遂乞致仕卒所著有蒙菴集

董阜民

董阜民德興人以明經舉任工部主事質直方毅不爲容悅時同官有被譖繫獄者阜民疾篤恐其罹刑置諫疏于懷死都門上憐其死諫命禮葬之遂赦被譖者

何英

何英鄱陽人性警敏絕人不事詞章往學於王松塢得饒雙峯黃勉齋之傳造詣益深松塢寄以詩有臞梅谷裏先春意句遂號梅谷累薦不起建玉溪書院以納天下來學所著有四書釋要詩經詳釋易經發

明諸書崇祀邑學鄉賢祠

高峻

高峻鄱陽人登宣德庚戌進士授監察御史巡按巴蜀值松藩叛平之明年按畿內屢辯冤獄倭寇犯浙江勅峻以行且假便宜克成厥績陞淞江叅政卒于官

王弼

王弼鄱陽人宣德癸丑進士授工科給事中上疏蠲逋負人懷其德陞順天府丞修飭山海居庸邊務經畫有方進應天府尹有惠政民戴之如父母累疏乞

歸足跡不入城府卒于家

戴 皞

戴皞字士儀浮梁人少承家學博覽彊記詞翰穎出以乙科授順德府學訓導當兵後人不知書皞教有方士知向學調嘉興府皞病文勝先行檢重經術故士多實才亦以績最進德清教諭一新學政士不舉凡十科自是舉者不絕父喪服闋改慈谿縣士恨得皞晚化其教者亦多有之秩滿歸省母母適病卒服既闋擢教授再蒞嘉興學者益衆有富民數輩遣養于人學皞不可民賂按察官彊皞執愈確坐是忤意

竟以他事去著西澗集及浮梁縣志若干卷應舉時
道見一士病臥風雨中瀕死扶入寓邸療治之久而
甦謝曰我郴州高信也旣揭榜信名第一其重義輕
施多類此

劉城

劉城鄱陽人少磊落有大志景泰丙子領順天鄉薦
授貴州道監察御史風聲震讐吏民憚之陞福建副
使剗弊發伏殆盡上杭盜劇城梟其渠魁散其脅從
患遂熄陞本省按察使風紀益厲勢家海販屏跡進
廣西右布政使轉右副都御史巡撫河南撫諸觸法

者立罪之戚宦斂輯閭閻忻樂更生疾作卒于官柩
歸之日家設香案舉奠者塞道

戴琥

戴琥浮梁人領景泰鄉薦授南道御史風裁凜然嘗
因平江路盜起劾罷巡江不職二重臣復陳四事皆
弭盜安民之要陞紹興知府政教並行民爲立德政
碑以繫去思擢廣西右叅政制馭夷獠區畫邊計皆
有成績以疾致仕卒

戴珊

戴珊字廷珍饒州府浮梁縣人天順甲申進士自幼

端亮有大志明性理之學務見於躬行成化二年擢
四川道監察御史廉慎公勤風紀截然奉勅督南京
學校時士習頽靡多緣飾詩書以獵聲稱珊正身率
之凡考校必以文藝占器識有請謁者遜不色拒而
終亦無所撓羣士帖服十四年陞陝西按察使副使
仍專學政如南畿又修古聖賢祠墓增秩祀典德教
風行在陝久待諸士如家人父子諸士亦愛慕不忘
稱誦至今久之陞浙江按察使秉公嚴正務崇大體
一時僚貳分巡各道者人異其見往往用已意出入
於法珊虛心比之多所平反其視身悉中矩矧識者

稱其端鯁雅飾不負軒公覲云踰二年進福建右布政使尋轉左自奉儉約無他嗜好退居惟焚香讀書而已於義利尤嚴靳不可渝終任不持閩中一物弘治二年鄖陽撫治缺人太宰王端毅公恕素重其賢薦陞右副都御史撫治其地時鄖陽諸府豪右多窟流聚爲利乃刻日令首罪民所闢田多匿稅略償所費而沒其餘嚴練兵伍自製爲營陣法蜀盜野王剛嘯聚不逞初起夔州新寧往來東鄉諸邑肆行劫掠遂入湖廣竹山竹谿又據漢中諸郡縣凡五年守臣畏罪莫敢發珊請令四川湖陝三省調兵誅之事下

兵部議移檄三省撫臣調兵進討珊檄副使朱漢等分道並進賊聞風奔潰乃約川湖兵深入賊巢麻柳壩所向克捷於庚戌十一月誅其首惡縱其餘黨千餘人事遂定踰年辛亥召爲刑部右侍郎與尙書何文肅公喬新彭惠安公韶俱以學行負時望相與同心一德期敬獄以長我國家凡正人受禍者雖忤旨不避若大奸宿猾盤據不可動者苟法所難宥屢請弗已也一時稱爲得人久之轉左命勘荊府不法事廷可其議九年遷南京刑部尙書畱都私人奸法詭訛是非珊慎三尺宜幽達滯皆犁然當人心又雅

重鎮定足爲士類與刑十三年召改左都御史掌院
事益自檢律務持風紀雖簿書之細必極精覈嘗與
吏部考察京朝官者一考天下述職官者再孝宗
親鞠大獄諸司震悚珊從容應對時有所開折天
威頓霽上知其清慎每廷奏宣面問至移晷刻引
疾求退必優詔勉畱命醫賜食十八年己丑春召珊
同兵部劉公大夏入各對畢上令中使出白金二
錠以賜且面諭曰朝覲日文官避嫌有閉戶不與人
接見者如卿等雖開門延客誰復以賄賂通也朕知
卿等故有是賜後珊屢以老疾求退孝宗不允一

日私懇於劉大夏曰珊老病子幼萬一客死異鄉地下不瞑目矣一日上召劉大夏議事畢因問戴某近來何如劉言戴有病累疏乞休出於實情伏望皇上憐而允之上曰卿去說與戴某朕以天下事推誠付托猶家人父子也太平未兆何忍捨朕而先歸乎劉以上語告珊泣曰吾不得返家矣未幾卒於官贈太子太保諡恭簡

黎福

黎福字天與樂平縣人中天順丙戌進士授浙江道監察御史以監順天鄉試直躬不比忤當道意出知

鎮江中貴人汪直將來江南勢張甚有司望塵迎拜
福恥與之面乃出行屬縣汪聞不果來又忤其意因
逮詔獄會典獄者素賢福事得白還郡以憂去服闋
改知襄陽又以憂去服闋改知寧國擢雲南左叅政
遂進廣西右布政使轉廣東左布政使擢都察院右
副都御史撫治鄖陽召還南京爲兵部右侍郎以疾
致仕卒壽六十有七福居官必竭心力爲之利害無
所計其爲御史數疏天下利病聞及宮闈事屢履危
境不爲變其按真定激揚惟允貴戚有強占民田者
歷數御史不敢辨悉奪還之民其人訴於上時彭惠

安公韶爲刑部郎中覆勘其事歎曰此真御史也因極疏其弊得釋由是名益顯其按四川亦如之而平反冤獄尤爲川人所稱以與平劇盜功賜金帛其爲郡一以安民爲務鎮江軍衛雜處武人暴虐無所忌民素苦之及聞來皆惴惴不敢犯事間有犯者悉據法懲之無所假民始獲安又正已率下一時大小官屬罔不洗濯其職其於弊政多所釐革而絕侵漁以甦驛遞量民產以均牧馬民尤便之其於教化畱意彌切公暇輒蒞學進諸生講說或課文藝且悉復其家以優異之其治寧國如治鎮江其在雲南兩廣皆

有惠政在勛陽節制三省首察文武吏才不當任者
易置之尤不職者黜之增設巡檢司學校以詰奸敷
教綱提領挈不事細瑣流民安業無一不靖者福天
性廉正不蓄婢妾不置貨利自雲南歸覺行李稍重
檢得錫器數事悉投之水曰不得以是汙我然簡而
有禮嚴而不苛嫉惡而不爲已甚不立崖岸而人自
不敢以私干之此則其尤過人者

張憲

張憲字廷式別號省菴饒州府德興縣人成化壬辰
登進士第觀政刑部卽畱意法比部長皆賢之十七

年會吏部選科道偶遺之衆皆疑愕尋乃授考功主事蓋尚書尹恭簡公旻知其所養醇正而欲畱自助也歷陞考功郎廉慎公勤十四年如一日甄別流品必先志行遇士夫之賢者輒以人才訪之有所聞籍記惟謹課覈之際以叅黜陟其人可用卽疎遠不相識必陰薦之考功以地望例遷卿佐鮮外補者弘治二年憲資旣深尚書王端毅公恕探所欲答曰懼官之弗稱賢耳奚内外之敢擇乎三年遂陞山東左叅政行部所至興廢典釋冤繫孜孜政務宗聖公墓在嘉祥蕪穢弗治歎曰事有似緩而實急者此類是也

命有司亟爲修築併葺其祠東土僻遠學政頗不修
於督饟之暇時卽黌舍爲諸生講說好以經術緣飾
又如此六年陞浙江布政使鎮守中官縱左右虐民
而攫其財乃廉其人置於理岳武穆祠在西湖故有
祭田二頃爲勢家所據檢覈昇祠又訪其苗裔使占
籍負郭得食其租入以世其蒸嘗交承庫藏主吏報
羨銀若干欲以動憲歎曰杭人方苦篚貢以此助之
豈非一分之賜乎吾弗能竊取爲自殖計也仍封職
貯之十年陞順天府尹事雖旁午處之裕如屢請寬
恤畿民以培植根本旱則虔誠致禱雨輒應久之望

龔權豪德孚士庶考最賜誥褒榮十四年陞工部右侍郎總理易州山廠統郡八役民數萬趨走之吏自郡倖而下餘百員故爲奸利囊橐憲曰近膩易汙吾其可弗慎哉總理用公差例日廩五升省八郡常供之餽簿書有關防以杜緣絕之欺柴夫納銀得痛損加耗之數於是宿蠹十去七八而積欠日漸以完十八年還蒞部事會武宗卽位諸邊告急戶部言諸邊賴鹽課而其法久壞請遣重臣釐正之遂兼左僉都御史以行親歷諸場炎瘴無所避適三品九年考滿陞右都御史仍督其事事將就緒正德二年賊瑾

專政議革巡撫召還以瑾勢徘徊於道久之三年始得蒞院事會審錄重囚本內寫劉瑾傳奉字多爲瑾所怒四年改復南京都察院本年陞南京禮部尚書瑾終惡不已附甫月餘內批致仕五年瑾誅最先召用改南京工部六年卒於位六十有六

舒清

舒清德興人登成化丙戌進士授工部主事自營繕郎中陞河南叅議歲饑請邀運米百萬分給一省賴以全活陞四川叅政立遞減法以便民轉右布政時有使者欲取庫藏銅鼓諸物疏節用愛人以止之轉

廣西左布政又有取古琴諸物之使復疏不貴異物
以止之田州土官承襲緣故習致謝金斥出備軍餉
民夷懷附尋以疾乞休致所著有直菴集操撫端恪
望重士林

戴璉

戴璉浮梁人早有大志力學希古登成化丙戌科人
號爲五經進士授大理評事以儒術濟法律兩上封
事率刑政根本之論未究厥施而卒士論惜之所著
有知非集

程廷珙

程廷珙浮梁人性孝友居母喪三年不御酒肉登成
化乙未進士歷郎中秉法嚴正陞福建叅議開渠建
陽以利灌溉民至今賴之時福寧諸路凶亂設法賑
濟民之死葬生養咸有賴轉廣西叅政進右布政使
克桐木渚巢擒渠魁黃鑑成等 孝宗以銀牌鏤奇
功二字及金繒獎之平賓州八寨之陸梁定東蘭韋
祖鉉之跋扈至於銷土官爭長之鋒致謝金二甕不
受平生政蹟類如此尋以國事卒於粵正德初舉祀
府縣鄉賢祠

祝 瀾

祝瀾德真人登成化己丑進士授兵科給事中侃侃
剛直轉國子監丞上廟祀議以聖賢像宜從國初
定制止祀木主路點鯉以父列于廡淵叅偁以子配
於殿似非明道正倫之義宜別建一室祀叔梁紇以
路點鯉配若公伯寮荀況之徒宜黜其祀爲人慷慨
尚氣節不以死生福禍爲意

孫需

孫需字孚吉德興縣人成化壬辰登進士筮仕爲常
州府推官常俗富侈訟輒恃賄取勝需遠嫌自潔勤
於訊鞠惟公惟明隱奸宿蠹摘決無所漏能聲驟起

巡撫牟俸重之凡獄之難決者率以屬之及經聽斷無不屈服運河淤塞撫按議取徑別鑿一河初委地方官延久緒弗就及屬需督理相地賦役約先完有賞民踴躍趨事不旬月而工告成三年例當奏課牟俸疏畱治事不得行又三年爲成化戊戌召入授南京四川道監察御史風裁凜凜畱都皆嚴憚之遇事必極言無所諱避妖僧以左道蠱憲廟率同列斥其罪請誅之雖遭箠未嘗以爲悔嘗奉命巡倉至中都鎮守中官欲謁者由旁門入且以文東武西榜於門需不入僅投一刺將據其所榜以僭劾之中官憚需

嚴卒正主客之禮時王端毅恕方叅留務最慎許可
輒造需加禮江盜熾需巡江以略授耆民張禮捕獲
幾百人有賊七十麓卽令錦衣衛同事簡千戶識以
印緘送之官奏禮爲巡檢專捕盜賊事自是江道寧
帖簡嘗對衆歎需之廉曰盜賊無籍使盡七十麓取
之固無知者而公不欺乃爾何可及耶廉聲由此益
著未幾陞四川按察司副使南臺陞副使蓋自需始
前此所未有也旣蒞任會憲長缺遂署其事公務弗
給率捐已俸給之略無難色按部治猾豪決淹獄明
而不苛所在奔赴賊吏或望風解印綬去比歸所得

紙劄價值輸之公無毫髮私入御史陳瑤以勢凌轢
二司獨於需曲加禮敬又以公廉嚴慎克振風紀薦
之歲侵糴貴民死過半湖廣倉粟頗多言於撫按偕
叅議金澤兼程往貸得三十萬石而西分地賑給所
全活甚衆蜀人感之咸曰微孫公吾皆爲道殣矣時
歷兩考當課巡撫都御史丘鼎疏畱視事蓋在蜀已
餘七年吏部推陞者五邑人有不悅需者譖於時宰
久乃不遷而需未嘗意動尋以憂歸故事藩臬舟行
以瞿塘灩澦之險命有司縛筏翼之至荆州市其竹
木可數百金需不欲斂民罔利竟拒不用亦竟無他

虞終喪改朝廣未上擢浙江按察使遇大獄必加覆
審未嘗輕決小吏苟無大過必保全扶植之臺使薦
賢監司者必首及弘治庚申陞浙江左布政使浙財
賦之淵需志避嫌謗出納皆委諸人公堂諸宿弊釐
革殆盡吏無所售其奸民謠有前劉後孫清德著聞
之語蓋以需可繼大司馬東山之躅也入覲例僉水
手取銀爲里道費朝士之贊亦取辦焉需峻拒贊率
從簡論者賢之第治行又居首及還浙未浹旬擢右
副都御史巡撫河南時河溢且嚙汴城民流移載道
乃議使役以築隄而予之傭錢令出趨者萬計隄成

而饑以濟公私便之羣盜橫行命督兵擒捕先後獲數十人復取其賊散州縣以充給濟之費他若讞獄平賊鋤強植弱孳孳在念民所便不便皆以次行罷無遺弘治癸亥 駕帖下河南取牡丹三千上疏耳目之玩不可勞民沁陽縣知縣馮憲忤宗藩已有旨下撫按官會訊尋復逮赴詔獄又疏令如反汗殊戾舊法 孝廟皆納其言而寢之居三年屬吏競勸民視如父母會鎮守中官劉瑯與需水火剝民自殖輒以法裁之有奸民違例赴瑯投愬牒者必據法配之荒裔琅嘗跽請於需曰瑯不能學公之公廉盍稍縱

繩墨使瑯得飲勺水以相安於此邪需心知瑯必害
已亦不爲動日夜陰圖中需大臣之子有怙勢橫於
其鄉者需亦裁以法於是瑯計得行會陝西巡撫缺
遂調往補益大臣亦不欲其久於汴也及去汴汴人
遮道扳留呼天而號曰何以爲我奪公而他畀也至
陝西經略武備拊循士卒取權貴所私役復之舊伍
他省有輸粟助邊者皆令躬自輦送無苦邊氓聞虜
警則以義激將士督之先驅而亦擐甲從之不以勞
避竟爲風寒所襲而病遂乞休詔不允召還京寓館
邸堅臥不起累以疏辭時 孝廟方命侍郎何鑑稽

覆荆襄流民而鄖陽其淵藪也乃改命撫治至則以文告諭之願爲編氓者給牛種俾有常業願歸故里者給餼遣還籍管內所得逋逃蓋數萬餘口又以教化爲撫民急務乃興建學舍擇秀民聚講其中有暇則親往課之未幾士習丕變應試者倍於疇昔武當屬在境內國家祈禱諸費出于民間需令有司籍記香錢悉貯均州歲可得萬金於是祈禱之費絲毫不擾於民鄖人謂前此撫治未有如需之精密者正德己巳陞南京禮部尚書時逆瑾專權陞者多以賄謝需以是忤瑾罰輸邊米數百石未數月矯旨令致仕

歸歸則故居已燬幾無以生需處之裕如也庚午瑾敗復用薦起南京工部尚書務整宿弊不欲以浮冗多耗民財先是諸營建給領料價率匠魁專之蒞部事者或與爲市故羣匠無所得而工不可速完需出納皆有成法黠者不得從中乾沒且歲省冗費萬金癸酉冬改南京刑部尚書諸司獄必親筆削處讞皆審慎人無冤稱甲戌夏考最遂改南京吏部尚書畱都務簡表以廉靜諸司翕然明年奉命考察庶官諸所存黜叅之公論無毫髮私徇其黜者止坐微罪不忍以太甚斥或曰如此則彼將不服且得藉口自文

需曰吾斬服彼之心苟公矣他何慮也蓋所點數人頗有時望聞者始而疑焉旣而廉之果當黜於是益服其明戊寅疏修政弭災戒遊畋抑權倖諸事以年及遂懇辭獲允俾乘傳歸里居自守益嚴於州縣無所干謁尋卒贈太子太保謚清簡

張吉

張吉字克修號翼齋餘干人成化辛丑登進士明年除工部營繕司主事時左道李孜省致位禮部侍郎妖僧繼曉以待水進乙巳元旦星隕有聲詔求直言吉上疏勸親賢圖治修德遠邪以謝天變顯劾二人

之罪疏入貶景東通判時追逮甚急故舊無送者所
携圖書數卷僮僕數人而已景東西南極邊其民鄙
戾土官陶氏世握郡章一仍其俗吉至下令率先以
孝弟忠信禮義廉恥民以事至庭諄諄曉諭使歸相
告語有不法者亦必薄示其罰約無再犯陶始見吉
空囊且無室家謀爲置妾不聽以銀器數事爲饋一
無所受已而遣子棨來學棨聞教卽能善事其父遇
母忌日或強以酒肉卽走避之夷民由是信服漸知
中州之化地僻乏書手錄諸經葺齋舍討論其中取
聖賢教人修身爲己之要慎獨窮理改過求仁作爲

四箴寘座右自勵在郡四年檄走蒙理威楚者半之
孝廟御極覃恩轉肇慶同知肇慶當蒼梧下流頻年
苦澇吉相其地曰是可以隄同列不以爲然獨以身
任之發民就役皆不令而集隄亘三縣當水暴漲則
乘小舟以視衆莫測其至嘗夜雨不止憂形於色坐
以待旦經營勞瘁歷三載而後成復爲竇以殺衝決
之勢民至今以姓姓竇以號號隄辛亥都御史秦紘
爲總兵柳某所誣逮赴詔獄吉爲疏曲直秦卒得白
癸丑轉梧州知府梧州乃兩廣鎮巡開府建節之地
諸司受約束而至者輪蹄交錯殆無虛日供張館穀

不勝其繁民多四徙不樂土著吉至凡百節損先是
榷鹽之利盡歸於守至是出以佐費復出其餘修壇
壝廣學舍凡不均之徭皆釐正之於是民之徙者舉
相率而歸暇日躬課諸生尤嚴於丁祭廟樂崩壞嘗
延樂師呂應禎聚諸生習之至於將事卜牲之外微
而俎非皆一一徧視觀者竦然生敬戊申考績入京
凡贊見當路惟所刻先儒學範晦菴詩略等書庚申
轉廣西按察副使備兵府江申教令嚴武備其教士
以射則懸金爲的中者與之又以意創鴛鴦鉤偏架
弩倣种世衡教射青澗及韓世忠製克敵弓之法時

害于賊深求其故以所轄沿江山川盤結林木蒙翳
或扼要害或縱斧斤以奪其藏伏之所又以賊恃藥
弩中者必死厚募解藥多置挨牌重賞間諜邀截出
入又以府江東西二賊相爲犄角而東賊慄悍尤甚
遂併力於東數月之間斬獲甚衆由是西賊聞之亦
皆自戢府江以寧正德改元轉本司按察使明年轉
山東右布政使已巳轉廣西左布政使二月發濟南
舟中讀象山語錄作陸學訂疑會召馳驛還京將處
以重任竟爲逆瑾所沮嘗謂禮之大體有四其冠婚
喪三者可守惟祭禮煞用斟酌書先小學四書而後

諸經謂學者不讀五經遇事便覺窒礙至於隱年就試大爲不可以時方進取乃爾則他日可知矣年六十八卒所著述有古城集貞觀小斷佛學論常取擇胡居仁居業錄集之謂之要語

李岱

李岱字宗岳樂平人而生穎異長能文魁其儕輩家貧嘗躬杵日以養親夜雨敗鄰人之垣若有藏物家人欲取焉岱聞而止之翌日其家始覺得錢數斛邑人有受金縱盜而情可原者縣令與其人有仇欲致之死翟清者被怨家誣告魔魅死罪岱皆營辦得出

登成化丁未進士弘治二年拜南京刑科給事中有
直聲上言檢身求言敬大臣體羣臣謹天戒諸事多
見采納尙書鄭時不職內官張廷縱恣殺人都御史
秦橫爲安遠侯柳景誣奏岱倡諸臺諫言之秦竟得
白時罷去廷寘於法又言前威寧伯王鉞不當寅緣
起用遷南京光祿寺少卿每歲上供天鵝鹿腊皆以
樊籠生致於洞庭嶺海五六千里之外民病之旣腊
或不堪充庖岱因災異陳言及之止徵其直上供法
醞每歲酒人綱送用舟八十餘艘役夫爲奸且不時
至岱爲之籍使有統紀弊遂絕正德三年考績至京

時劉瑾用事大肆饕虐公卿而下鮮不以賂通皆無所餽或曰君禍至矣曰命也奈何竟出爲陳州府吏部薦爲太僕少卿瑾識其名令致仕瑾誅補陝西布政司叅政未行卒年六十八王雲鳳曰正德庚午余謝病歸山李公來會告予以劾蔣琮事曰琮初守備南京欲陷縉紳不測之禍以立威誣訐臺諫數十人謫以去勢益張又連訐諸司官俛首就逮寃鬱不伸念予爲言官不可坐視一日予騎馬出門墨墨獨行忽遇郭御史告之故郭欣然同議乃歸疏琮大罪數事上之琮遂下獄死公爲言官所論列關於朝廷政

治之大者雖多惟蔣琮則當其寵幸初隆之日尤爲人所難

彭程

彭程鄱陽人成化丁未進士弘治初授御史巡察京城內外先是北虜投降者皆安置畿甸歲日以盛且梟雄莫制每朔風塵起騁騎彎弓掠人道上事洩索急則投戚里閹奴爲援程每得其機牙發之奇中人驚爲神繼巡浙江鹽法監收光祿寺財賦釐奸革弊風紀肅然時政有無益之費事干宮闈者程抗疏忤旨下詔獄謫戍隆慶明年釋歸時稱爲真御史

俞廷瓚

俞廷瓚鄱陽人以進士授行人司副正德己卯武
宗南巡廷瓚條上十事皆人所不敢言者而極切剴
至奮不顧身遂死于諫嘉靖改元遣官諭祭

劉蒼

劉蒼字伯春安仁人廣洋衛副千戶端重英敏超越
行輩十五歲入武學身自刻勵不煩督獎每赴演武
教場夜四鼓起讀將鑑一篇場中鼓嚴乃進食食且
惡必盡三四器乃上馬去返越午矣不食於市家人
詰之則對曰一人之市食一家之日食也身通小學

四書史略七書將鑑諸籍又能爲宋趙孟頫書吳英
者指揮也廉甚不苟取瞰蒼其同志也學且優焉有
緩急輒叩門以請遂爲莫逆交及蒼子麟舉進士謁
英英呼之曰子勿學他貪墨者以隕爾父之志否雖
官至卿相英不願見也初蒼雅好儒學而職事不遂
謂麟曰夫讀書可以建功業濟斯民吾已矣小子其
成之於是有趙經先生者亦千戶也明經而習舉子
業然遵禮尙志旬月之間不越戶閭篋中藏二青布
袍必祭先壽親訪賢也沐浴而後着之卒事猶藏焉
蒼以爲賢遣麟師事之然無以贄也每獲折俸布帛

以布白衣以帛贊先生先生以麟貧不受蒼曰不贊
無以遣吾子也必贊之指揮龔海甘貧自守行年七
十好學不倦謝政閉門旁開小戶自搗藥以賣其價
不二然好誦孟子或從趙先生講焉趙先生後進也
輒正講席而後旁聽之戚黨有爲卿相者還龔將改
服以謁聞其載寶而還也遂絕跡不往或怪云此其
門其少龔海者之足哉海死而子勳守學不改人以
爲海未死也夫龔氏父子其介若是不可犯也獨于
蒼終始敬重不衰蒼嘗及寮案伐水入凌室一士凍
餒跌仆水間羣士載水爭蹂躪其上幾死矣蒼力關

羣士解紳挽出士得不死當是時也趙端者覘之心
重其行遂納交焉趙端者趙經先生之父也年且七
十又尊行也而又敦廉尚義不妄與人遂呼蒼爲兄
弟云一日攜蒼至其家命家人具饌以食蒼家無具
移時不至蒼退端責其子經曰劉伯春予所畏服者
也非他人比今乃不能令我完一雞黍約邪取大杖
杖經且令其出妻時麟方學於經奔告蒼蒼趨至趙
氏曰朋友與家室孰重假令經出其妻再娶弗賢令
爾此孫不立若何趙怒方霽乃令再具饌歡宴而罷
嘗有納戶起解千金取回關單誤遺道路蒼曉行獲

焉日候其處三日矣一人頓足撫胸呌號而來曰天
乎何殺我之酷乎蒼趨而問之人告之故蒼出單與
之其人頓首曰公德生我矣酬以數金笑而不受年
六十誥封武略將軍正德辛未年六十八卒

劉麟

劉麟字元瑞號南坦安仁縣人南京廣洋衛籍麟性
資澄朗弱冠領弘治壬子鄉薦丙辰登進士觀政虞
衡時科道龐泮等論劾外戚張氏驕橫骹法忤旨下
詔獄拷治甚急麟與歸安陸崑抗章申抆 敬皇爲
之霽威獄寢解尋丁母憂制終除刑部河南司主事

十八年陞本司員外郎錄畿內囚執法折中不拘成
案疏雪冤抑無慮數百人正德二年陞刑部山東司
郎中三年陞浙江紹興府知府抵郡躬理簿書清刑
獄裁供應甫五月民皆嚮方逆瑾銜其在部時以事
觸忤及出守又不修謁掇郎中時瑣事黜爲民越人
扳呼如失父母爭致贐麟笑曰勤苦諸君吾治不及
劉寵敢蒙一錢惠耶旣去越人肖像爲小劉祠祀之
求太宰王海日翁華紀其事於石歸值歲侵饔餐不
給士大夫相率曰可使劉允瑞至此耶湖州吳子琬
施子侃慕其素行迎入湖相與論道蒙山之董塢與

關中孫大初宜春龍子電結社爲湖南五隱謹誅起
補西安府陝西戴之如越六年丁外艱都憲藍章憂
其無以爲喪檄諸司治車馬資悉却不受會宸濠構
亂弗克歸安仁遂於吳興安厝九年服闋起陞陝西
右叅政屬關內饑虜數入寇朝遣貴臣督兵議軍餉
將加賦秦民諸司莫敢持麟曰不可靖邊本以爲民
今若此恐內難作亦可虜也貴臣變色曰憂民者獨
叅政耶適陝西有赴闕陳訴者 命下麟共圖其便
議乃得寢于是覈侵漁括逋負邊儲竟以不乏十年
擢雲南按察使十年致仕嘉靖初年起爲太僕寺卿

值繼母疾畱妻家侍獨旅寓每退食焚香如坐禪室
元輔楊石齊過其門見雙藤倚戶飄香載道問曰此
爲誰從人以麟對楊公歎賞遣人致意去嘉靖二年
陞右副都御史巡撫保定等處節勵屬官節財用存
贖爲備荒禦虜計畿甸以寧因疾作四上疏得允
歸六年丁亥再起大理寺卿七年陞刑部左侍郎本
年陞工部尙書麟遇事不避嫌咨白吏部進退其屬
凡銓除者悉訪才廉充任先是四司銀貨各在所司
儲之出納各任司屬自擅弊日滋卒難稽核上疏創
建一庫刷四司之財貯之特銓主事一人與御史一

員同典出納又請侍郎一員專稽其數 上嘉獎賜
名節慎庫自是財無虛耗司屬免於賊敗部中每歲
內府二十四監局不時題派不受覆覈乃考據前章
或議罷或議減不輒徇又擇其甚者十二事條上得
旨裁之省費十之四五中貴人由是切齒八年己丑
秋七月 上遣近璫督造龍袍於蘇松麟謂監局自
有常供請停便忤 旨勅致仕十年辛卯安陸大雨
顯陵殿宇滲漏以興工在麟視篆時追論落職間住
退歸寓居長興之瀆南坦一室頽如家無儲積郡守
萬雲鵬重其清貧爲築讀書臺邑令楊上林又爲之

建堂曰廣心亭曰澣露因阻涉乃架橋於門曰龍津
謝絕塵事非慶吊不至城郭郡邑之政絕口不談公
卿臺諫推其行誼頻薦於朝有述以告者若罔聞焉
滿室惟圖書數卷朝夕省玩有所得輒書屏間久之
屏表裏斑如遇文士至則展所蓄諸名家翰墨欣賞
終日題其楣曰半壁時觀我羣峯日可賓蓋瀟然超
脫於風塵之外者文冲泊雅淡中有奇崛氣皆冥與
神會詩擬盛唐書法宗羲獻尺牘片簡人爭寶之及
山棲日久心鏡澄徹妙契玄理以故聰明色澤彌老
不衰至辛酉歲忽一日命書曾點暮春者至咏而歸

一段懸於正寢朝夕相對怡然自得人莫測其故至四月二日無一語及家事神清氣爽而逝視所懸蓋前知也享年八十有七 上聞賜祭葬贈太子少保謚清惠

余祐

余祐字子積號訥齋鄱陽人自幼穎異始入小學卽慨然有求道之志聞餘干胡居仁潛心踐履徒步往師之一見謂其器可以遠到以女女焉祐學問谿逕啓發於居仁者最蚤成化丙午領鄉薦登弘治己未進士授南京刑部貴州司主事轉廣西司員外正德

戊辰勲臣有爭襲者祐嘗署其案忤逆璫劉瑾意落
職瑾誅大臣以廉正執法薦起家知福州府愛人卹
獄事先大體不以耳目摘發爲聰明鎮守內臣豪買
市物不予直又以白金二百兩強府令爲市改機若
干祐入其金於帑民以不予直訴者十百爲羣涕泣
慰遣之將以狀聞於朝鎮守懼稍戢求以事撓祐會
天旱衆請禱雨鎮守曰余知府自謂愛民必能感動
天地而使之獨禱祐齋戒出郊雨隨應鎮守慙愈媚
嫉思以傾祐陰遣人構于厰衛曰不去余知府鎮守
不得伸手也祐行素高媒孽竟無所得則譏爲好言

曰余知府好官吾豈敢不敬之但好官亦無庸慢我會遷山東按察司副使始解丁父憂未上服除補山東整飭徐州兵備南京進貢內臣多挾商貨索夫馬價至數倍知州樊準白祐祐命詰其私貨入之誣逮錦衣獄謫廣西南寧府同知稍遷韶州知府投劾去世宗登極詔復副使陞河南按察使屢與撫按兩院爭可否平反冤獄按黜巨賊以數十當其據理以爭辭氣棘棘聽者至不能堪乃因考察橫中之其劾章有心慕乎古氣失之偏之語祐聞之笑曰偏則有之慕古吾豈敢也坐調廣西按察使遷湖廣右布政

雲南左布政使以太僕卿召未行轉吏部右侍郎祐
自調廣西後公論益以明白當國者知祐剛正可大
用故三任皆未久而遷吏侍報至卒嘉靖戊子年六
十四學務有用不事空言發端於居仁而推其本原
以爲出於程朱之書尤究心焉其言曰程朱教人拳
拳以誠敬爲入門學者豈必多言惟去其念慮之不
誠不敬者使心地光明篤實邪僻詭譎之意勿畱其
間不患不至於古人矣其時公卿間有指主敬存養
爲朱子晚年定論者乃撫朱子初年之說以折之謂
其入門功夫非晚年乃定又輯朱子書之切治道者

爲經世大訓其論及文章辭翰者爲游藝錄見其學之備體用兼大小非近時所謂單傳妙訣者可擬也

胡居仁

胡居仁字叔心餘于人幼穎異有大志七歲學於家塾言動如老成人旣而學于康齋慨然以古人自期斯道自任以記誦詞章爲不足事專用心於內其學以主忠信求放心主敬爲要因名敬齋處家庭如朝堂對妻孥如賓客端莊凝重履繩蹈矩造次顛沛未嘗少違隱微幽獨之際愈嚴愈密每日必立課程詳書得失自考終日竟夕孳孳不倦見義勇爲不擇利

害爲趨舍排異端振流俗高風偉節儀表江南所著
有居業錄敬齋集門人吏部尙書余祐曰先生弱冠
時奮志聖學往遊康齋先生門退而藏修于家讀書
窮理存諸心者不以一時或息反諸身者不以一事
或遺久之則知益精守益固養益裕而所得益深矣
居業錄者先生道明德立無可告語事有感于外而
無可施行故筆之于冊取易脩辭立誠之義其間論
聖賢德業經傳旨趣學問工夫政教基本性命淵微
不一而足至異端佛老之學尤深辯詳闢惟恐其陷
溺人心變亂士習蓋亦有爲而發故其詞繁而不殺

本朝名臣傳卷之二十一
三
馬

桂萼

桂萼字子實饒州府安仁縣人自幼從兄華私淑吳與弼胡居仁之緒論其學以收斂身心爲主本以孝弟忠信爲實踐以經綸康濟爲事業而天文地理禮樂名物師田水利以及醫卜農圃之書靡不究心期於致用正德辛未舉進士授丹徒知縣歷武康成安所至敦古行明教化抑豪強有聲獨性剛執不能與時俯仰動以此見戾嘉靖癸未擢南京刑部主事時廷議大禮統嗣二字未明部中主事張璁先有二疏

爲執政諸人沮斥天下洵洵莫識誰何而張孤立聞
萼至喜曰是可與明禮者比至語果合遂上疏明經
統之公辯立嗣之私三年同張被召至京與廷臣辯
論上意始決六月禮成進翰林院學士四年陞詹
事兼學士五年正月萼與刑部尙書趙鑑爭論給事
中陳洸罪犯攘臂相加南京戶科給事中林士元劾
之章下所司六年陞禮部右侍郎建言清言路以定
國是乞如成化間令科道互相糾劾部覆並無事例
得旨旣先年有行還着他互相糾舉萼復題除奸欺
以通壅蔽得旨令部查明隨該部疏覆查得成化間

以糾劾因而奉 旨非考察拾遺旨下既有 憲宗
聖旨夢所言不爲無據何不早查明覆奏且不究還
着他互相糾舉來說本年改吏部左侍郎陞禮部尚
書七年改吏部尚書加太子太保尋加少保八年七
月命兼武英殿大學士八月致仕九月召還 上深
禮眷稱以俊彥宿學賜銀圖書二曰忠誠靜慎繩愆
匡違夢亦奮勵凡啓沃 君心揚薦士類與夫軍國
生民之計知無不言言無不盡九年十二月致仕卒
於家贈太傅謚文襄有奏議八卷

補遺

計澄

計澄字本清江西浮梁縣人永樂十九年進士由商河知縣選山西道御史巡按福建丁憂復除雲南道巡按浙江建言謫廬州府推官陞楚雄府知府廣西按察使致仕

盧瓊

盧瓊字獻卿浮梁縣人正德六年進士由固始知縣選浙江道御史巡按順天嘉靖元年議李僧獄謫戍赦歸卒隆慶元年贈光祿少卿

李頤

李頤字惟貞號及泉饒州府餘干人隆慶戊辰進士授中書舍人已而擢陝西道御史疏舉理學胡居仁宜與薛瑄並祀孔廟申救御史胡濬景嵩等以建言忤旨受杖爲民尋復職奉命清戎楚粵時江陵相勢正張赫一切謝絕關白惟王命是供三尺法是執以是與江陵父忤出守湖州府湖多豪貴人凌法滅紀至則捕橫惡子弟不悛者傳爰書死于獄中一郡肅清備兵吳中時具區謀叛幾萬餘人議先據南徐次掠旁郡改元弘閏乃潛授方略縛渠魁立磔殺之總憲三楚湧繁勝殘囹圄無寃民部屬鮮昧吏時

郎卒倡亂郎陽沈守以株連獲罪 天子震怒禍且不測乃條陳兩臺以百口保之得 俞旨守竟得脫復密謀纖兵之首亂者不移旬安堵如故久之以河南右轄陞御史中丞撫漁陽漁陽爲三輔重地時昂首要撫賞黜驚難馴設伏擒其心腹狡虜小郎兒等七名宣揚國威諭以禍福操歲賞予奪制其死命昂首讐服改撫順天永順間頻年旱魃疏請粟數萬石分賑以救死徙責成正官躬率舉行 詔遷南京右都御史總督河漕兼程赴任蒙霜露涉風波奔馳千里周咨必然之畫而又時詘舉羸焦思蒿目正督率

各屬巡行經度間忽嘔血數升不止輿回濟署而卒
訃聞贈大司馬廕錄一子祭葬如制